

Orashon ta nifiká papia ku **Dios Tata**. **Orashon** den **Hebreo** ta nifiká entre otro; **papia, roga, yora, sklama, supliká, grita, intervení, husga i outo-husga, faboresé, arbitrahe, meditá, proklamá.**

Den **Génesis 3:6** nos por haña e historia di e **Fruta Prohibí**. Ora ku e muhé a mira ku e palu tabata **Bon pa kuminda**, i ku e tabata un **Delisia pa bista**, i ku e palu tabata **Deseabel pa haña Sabiduria**, ela kohe di su fruta i a kome; i ela duna su esposo tambe ku tabata huntu kuné, i esei tambe a kome. Esaki ta e **tres** aspektonan di **pika**. E **satanas**, e **maestro gañadó**, tin hopi manera pa laga kosnan **Prohibí muestra manera Bon, Delisia i Deseabel** pa nos. E ta **gaña** nos i laga nos pensa ku nos mester e kosnan aki ku ta **muestra manera Bon, Delisia i Deseabel**, pero den **Realidat** e kos nan aki ta **bobedat, doloroso** i trese **desgrasia** pa nos. E **maestro gañadó** no tin nos bienestar na promé lugá, e no ta preokupá ku nos **alma** ta bai pèrdí. E **maestro gañadó** kièr pa nos hasi **pika** den e **Speransa** ku nos ta **kontaminá, korumpí òf konfundí** nos **Amor** pa **Dios Tata**.

Pero **Dios Tata** kièr pa nos biba den un **presente briante**. **Dios Tata** kièr pa nos **gosa** di kada minüt ku nos tin riba e **mundu** aki, pero **Dios Tata** kièr pa nos biba ku un **Espektativa Eterno**. Asina aki nos no ta **kontaminá, korumpí òf kibra** nos **Amor** pa **Dios Tata**. Laga mi duna un ehèmpel di e **Espektativa Eterno** ku nos tin. Abo a graba riba video e final di futbòl mundial, pasobra abo mester a bai trabou. Awor dor ku ta final mundial, e notisia tabata riba radio i abo a tende ken a **Gana**, bo ekipo favorito a sali **Ganadó!**. Sabiendo ken a **Gana** a kambiá tur e **Espektativa** di e wega, pero abo kièr a wak e tòg. Miéntas abo tabata wak e video, ta tin okashonnan ku bo ekipo tabata **pèrdiendo** i abo a kuminsá pensa; "ai no, nos ta atras, ta kon nos ta bai **Gana**?. Nos no por bini bek di e fayó aki, ta kon nos ta bai **Gana** awor?" Diripiente abo ta realisá ku e **Realidat** ta, ku bo ekipo a **Gana** kaba, ta un video abo ta wak. I asina ora e otro ekipo hinka un gol, abo por a hari, pasobra abo sa kaba kiko e final ta. Abo no tin nodi di kunsumí òf grita ku nos ta **pèrdiendo**, pasobra abo sa e resultado final kaba. Nos ta **Ganadó**. Nos ta **Viktorioso**.

Nos ta **Ganadó**. Nos ta **Viktorioso** kaba, ta esei ta e **Espektativa Eterno** ku **Dios Tata** kièr pa nos tin. Nos ta bibando den un presente yen di **Problema** i tin dianan ku nos ta por sinti nos **desepshoná, desanimá òf derota** dor di e sirkunstansianan. Ta e ora ei nos mester **bisa, proklamá, sklama i grita** aló **Kontrario** i pone nos bista riba e **Espektativa Eterno** di **Dios Tata**. Ta fásil pa sinti ku kosnan no ta bai **Bon** òf ku **Dios Tata** no ta tende nos **Orashon**, pero laga ami bisa abo un **Bèrdat** grandi. **Orashon** ta bini di **Dios Tata**, (**Isaías 55:8-13**). **Dios Tata** su **Spiritu Santu** ta papia ku abo i ami su **Spiritu**. Ta **Dios Tata Su Palabra** ta sali bini den abo i ami su kurason i no ta bai bek serka **Dios Tata** sin realisa **Dios Tata Su Palabra**, ku ta sali for di **Dios Tata Su boka**. **Dios Tata Su Palabra** lo no bolbe bashí serka **Dios Tata**, sin kumpli ku loke **Dios Tata** ta **Deseá**, i sin alkansá e **Propósito** ku kual **Dios Tata** a manda **Su Palabra**.

Pa terminá ku **Orashon**, nos mester sa ku **Amor** no ta un historia ku un **final felis**, pero **Amor** ta un historia **sin final**. **Yeshua Mesias** tin e **Viktoria**, ora nos skohe pa stima e hende nan ku e **Amor** di **Dios Tata**, nos lo mira kambio. No trata hende manera abo kièr wòrdu trata, ma trata hende manera **Dios Tata** lo trata nan. Ta pa esei ami su **Orashon** ta semper "**Tata Abo Su Boluntat sea hasi**". Mi kièr pa abo sa e **Bèrdat** di **Dios Tata** su **Promesa Eterno**. Den nos bida **Eterno**, ta **Amor** ta e úniko kos ku ta importante.

16 December 2016
Sea Bendishoná den e Amor di Yeshua Mesias
Rev. Remsly L Riley